

刘宾客文集

一
五册

劉賓客文集卷第二十四

七言五十六首

西塞山懷古

西晉樓船下益州金陵王氣漠然收
千尋鐵鎖沈江底一片降幡出石頭
人世幾回傷往事山形依舊枕寒流
今逢四海爲家日故壘蕭蕭蘆荻秋

陽山廟觀賽神

梁松南征至此遂爲其神在朗州

漢家都尉舊征蠻血食如今配此山
曲蓋幽深蒼檜下洞簫愁絕翠屏閒
荆巫脈脈傳神語野老婆娑啟醉顏
日落風生廟門外幾人連蹋竹歌還

漢壽城春望

古荆州刺史治亭其下有子胥廟兼楚王故墳

漢壽城邊野草春荒祠古墓對荆榛田中牧豎燒芻狗
陌上行人看石麟華表半空經霹靂碑文纔見滿埃塵
不知何日東瀛變此地還成要路津

後梁宣明二帝碑堂下作

玉馬朝周從此辭園陵寂寞對豐碑千行宰樹荆州道
暮雨蕭蕭聞子規

荊州道懷古

南國山川舊帝畿宋臺梁館尙依稀馬嘶古樹行人歇
麥秀空城澤雉飛風吹落葉填宮井火入荒陵化寶衣
徒使詞臣庾開府咸陽終日苦思歸

朗州竇員外見示與澧州元郎中郡齋贈答長

句二篇因而繼和

鴛鴦差池出建章
綵旗朱戶鬱相望
新恩共理犬牙地
昨日同含雞舌香
白芷江邊分驛路
山桃蹊外接甘棠
應憐一罷金閨籍
枉渚逢春十度傷

蚤春對雪奉寄澧州元郎中

新賜魚書墨未乾
賢人暫屈遠人安
朝驅旌旆行時令
夜見星辰憶舊官
梅蘂覆階鈴閣煥
雪峯當戶戟枝寒
甯知楚客思公子
北望長吟澧有蘭

竇朗州見示與澧州元郎中早秋贈答命同作

鄰境諸侯同舍郎
芷江蘭浦恨無梁
秋風門外旌旗動
曉露庭中橘柚香
玉簟微涼宜白晝
金笳入莫應清商

騷人昨夜聞題鵠不歎流年惜眾芳

衢州徐員外使君遺以縞紵兼竹書箱因成一

篇用答佳貺

按此郡本自婺州析置徐州自台州遷

爛柯山下舊仙郎列宿來添婺女光遠放歌聲分白紵
知傳家學與青箱水朝滄海何時去蘭在幽林亦自芳
聞道天台有遺愛人將琪樹比甘棠

唐秀才贈端州紫石硯以詩答之

端州石硯人間重贈我應知正草玄闕里廟堂空舊物
開方竈下豈天然玉螭吐水霞光靜綵翰搖風絳錦鮮
此日傭工記名姓因君數到墨池前

覽董評事思歸之什因以詩贈

幾年油幕佐征東，卻泛滄浪狎釣童。
敲枕醉眠成戲蝶，抱琴閑望送歸鴻。
文儒自襲膠西相，倚杖能齊塞上翁。
更說扁舟動鄉思，青菰已熟奈秋風。

松滋渡望峽中

渡頭輕雨灑寒梅，雲際溶溶雪水來。
夢渚草長迷楚望，夷陵土黑有秦灰。
巴人淚應猿聲落，蜀客船從鳥道回。
十二碧峯何處所，永安宮外是荒臺。

揚州春夜李端公益張侍御登段侍御平仲密
縣李少府暘祕書張正字復元同會於水館對
酒聯句追刻燭擊銅鉢故事遲輒舉觥以飲之
逮夜艾羣公沾醉紛然就枕余偶獨醒因題詩

於段君枕上以志其事

寂寂獨看金燼落紛紛只見玉山積自羞不是高陽侶
一夜星星騎馬回

逢王十二學士入翰林因以詩贈

時貞元二十一年王以藍田

尉充學士

廐馬翩翩禁外逢星槎上漢杳難從定知欲報淮南詔
促召王褒入九重

闕下口號呈柳儀曹

綵仗神旗獵曉風雞人一唱鼓蓬蓬銅壺漏水何時歇
如此相催卽老翁

監祠夕月壇書事

其禮用畫

西皞司分晝夜平羲和亭午太陰生鏗鏘揖讓秋光裏
觀者如雲出鳳城

戲贈崔千牛

學道深山許老人畱名萬代不關身勸君多買長安酒
南陌東城占取春

元和甲午歲詔書盡徵江湖逐客余自武陵赴
京宿於都亭有懷續來諸君子

雷雨江湖起臥龍武陵樵客躡僊蹤十年楚水楓林下
今夜初聞長樂鍾

江陵嚴司空見示與成都武相公唱和因命同

作

南荆西蜀大行臺幕府旌門相對開名重三司平水土
威雄八陳役風雷彩雲朝望青城起錦浪秋經白帝來
不是郢中清唱發誰當丞相揆天才

徵還京師見舊番官馮叔達

前者恩恩襍被行十年顛顛到京城南宮舊吏來相問
何處淹留白髮生

故洛城古牆

粉落椒飛知幾春風吹雨灑旋成塵莫言一片危基在
猶過無窮來往人

元和十一年自朗州承召至京戲贈看花諸君
子

紫陌紅塵拂面來無人
不道看花回（玄）都觀裏桃千樹
盡是劉郎去後栽

再遊（玄）都觀絕句 并引

余貞元二十一年爲屯田員外郎時此觀未有花是歲
出牧連州尋貶朗州司馬居十年召至京師人人皆言
有道士手植仙桃滿觀如紅霞遂有前篇以志一時之
事旋又出牧今十有四年復爲主客郎中重遊（玄）都蕩
然無復一樹唯兔葵燕麥動搖於春風耳因再題二十
八字以俟後遊時大和二年三月

百畝中庭半是苔
桃花靜盡菜花開
種桃道士歸何處
前度劉郎今又來

望夫石

正對和州郡樓

終日望夫夫不歸化爲孤石苦相思望來已是幾千載
只似當時初望時

金陵五題

并引

余少爲江南客而未遊秣陵嘗有遺恨後爲歷陽守跂
而望之適有客以金陵五題相示迺爾生思歛然有得
他日友人白樂天掉頭苦吟歎賞良久且曰石頭題詩
云潮打空城寂寞回吾知後之詩人不復措詞矣餘四
詠雖不及此亦不孤樂天之言爾

石頭城

山圍故國周遭在潮打空城寂寞回淮水東邊舊時月

夜深還過女牆來

烏衣巷

朱雀橋邊野草花
烏衣巷口夕陽斜
舊時王謝堂前燕
飛入尋常百姓家

臺城

臺城六代競豪華
結綺臨春事最奢
萬戶千門成野草
只緣一曲後庭花

生公講堂

生公說法鬼神聽
身後空堂夜不扃
高坐寂寥塵漠漠
一方明月可中庭

江令宅

南朝詞臣北朝客歸來唯見秦淮碧池臺竹樹三畝餘
至今人道江家宅

謝寺雙檜

揚州法雲寺謝鎮西宅古檜存焉

雙檜蒼然古貌奇含煙吐霧鬱參差晚依禪客當金殿
初對將軍映畫旗龍象界中成寶蓋鴛鴦瓦上出高枝
長明燈是前朝燄曾照青青年少時

韓信廟

將略兵機命世雄蒼黃鍾室歎良弓遂令後代登壇者
每一尋思怕立功

秋夜安國觀聞笙

織女分明銀漢秋桂枝梧葉共颺颺月露滿庭人寂寂

霓裳一曲在高樓

洛中寺北樓見賀監草書題詩

高樓賀監昔曾登壁上筆蹤龍虎騰中國書流讓皇象
北朝文士重徐陵偶因獨見空驚目恨不同時便伏膺
唯恐塵埃轉磨滅再三珍重囑山僧

聞韓賓擢第歸覲以詩美之兼賀韓十五曹長
時韓牧永州

零陵香草滿郊坰丹穴雛飛入翠屏孝若歸來呈畫讚
孟陽別後有山銘蘭陔舊地多纔結桂樹新枝色更青
爲報儒林丈人道如今從此鬢星星

寄楊八壽州

風獵紅旗入壽春滿城歌舞向朱輪八公山下清淮水
千騎塵中白面人桂嶺雨餘多鶴迹茗園晴望似龍鱗
聖朝方用敢言者次第應須舊諫臣

李賈二大諫拜命後寄楊八壽州

諫省新登二直臣萬方驚喜捧絲綸則知天子明如日
肯放淮陽高臥人

宣上人遠寄賀禮部王侍郎放榜後詩因而繼

和

禮闈新榜動長安九陌人人走馬看一日聲名徧天下
滿城桃李屬春官自吟白雪銓詞賦指示青雲惜羽翰
借問至公誰印可支郎天眼定中觀

贈東嶽張鍊師

東嶽真人張鍊師高情雅淡世間希堪爲烈女書青簡
久事元君住翠微金縷機中拋錦字玉清壇上著霓衣
雲衢不要吹簫伴只擬乘鸞獨自飛

祕書崔少監見示墜馬長句因而和之

麟臺少監舊仙郎洛水橋邊墮馬傷塵汗腰間青盞綬
風飄掌上紫遊韁上車著作應來問折臂三公定送方
猶賴德全如醉者不妨吟詠入篇章

寄楊虢州與之舊姻

避地江湖知幾春今來本郡擁朱輪阮郎無復里中舊
楊僕卻爲關外人各繫一官難命駕每懷前好易沾巾

玉城山裏多靈藥擺落功名且養神

秋日題寶員外崇德里新居

寶時判
度支案

長愛街西風景閑到君居處暫開顏清光門外一渠水
秋色牆頭數點山疏種碧松通月朗多栽紅藥待春還
莫言堆案無餘地認得詩人在此間

蒙恩轉儀曹郎依前充集賢學士舉韓湖州自

代因寄七言

翔鸞闕下謝恩初通籍由來在石渠暫入南宮判祥瑞
還歸內殿閱圖書故人猶在三江外同病凡經二紀餘
今日薦君嗟久滯不唯文體似相如

途次華州陪錢大夫登城北樓春望因覩李崔

令狐三相國唱和之什翰林舊侶繼踵華城山
水清高鸞鳳翔集皆忝夙眷遂題是詩

城樓四望出風塵見盡關西渭北春百二山河雄上國
一雙旌旆委名臣壁中今日題詩處天上同時草詔人
莫怪老郎呈濫吹宦途雖別舊情親

三鄉驛樓伏覩玄宗望女几山詩小臣斐然有
感

開元天子萬事足唯惜當時光景促三鄉陌上望仙山
歸作霓裳羽衣曲仙心從此在瑤池三清八境相追隨
天上忽乘白雲去世間空有秋風詞

洛下初冬拜表有懷上京故人

鳳樓南面控三條拜表郎官蚤渡橋清洛曉光鋪碧簾
上陽霜葉翦紅綃省門簪組初成列雲路鴛鸞想退朝
寄謝慇懃九天侶槍榆水擊各逍遙

尉遲郎中見示自南遷牽復卻至洛城東舊居
之作因以和之

曾遭飛語十年謫新受恩光萬里還朝服不妨遊洛浦
郊園依舊看嵩山竹含天籟清商樂水遶庭臺碧玉環
留作功成退身地如今只是暫時閑

洛中謝福建陳判官見贈

潦倒聲名擁腫材一生多故苦遭迴南宮舊籍遙相管
東洛閑門晝未開靜對道流論藥石偶逢詞客與瓊瑰

怪君近日文鋒利新向延平看劍來

始聞秋風

昔看黃菊與君別今聽_(玄)蟬我卻回五夜颼颼枕前覺
一年顏狀鏡中來馬思邊草拳毛動鵬盼青雲睡眼開
天地肅清堪四望爲君扶病上高臺

和蘇十郎中謝病閑居時嚴常侍蕭給事同過
訪歎初有二毛之作

清羸隱几望雲空左掖鴛鸞到室中一卷素書銷永日
數莖斑鬢對秋風菱花照後容雖改著草占來命已通
莫怪人人驚蚤白緣君尙是黑頭翁

酬淮南廖參謀秋夕見過之作

休公昔爲揚州從事參謀從釋

子反
初服

揚州從事夜相尋無限新詩月下吟初服已驚玄髮長
高情猶向碧雲深語餘時舉一杯酒坐久方聞數處砧
不逐繁華訪閒散知君擺落俗人心

題王郎中宣義里新居

愛君新買街西宅客到如遊鄠杜閒雨後退朝貪種樹
申時出省趁看山門前巷陌三條近牆內池亭萬境閑
見擬移居作鄰里不論時節請開關

酬朗州崔員外與任十四兄侍御同過鄙人舊
居見懷之什時守吳郡

昔日居鄰招屈亭楓林橘樹鷓鴣聲一辭御苑青門去

十見蠻江白芷生自此曾沾宣室召如今又守闔閭城
何人萬里能相憶同舍仙郎與外兄

任侍御子外兄崔員外南宮同官

美温尙書鎮定興元以詩寄賀

旌旗入境犬無聲戮盡鯨鯢漢水清從此世人開耳目
始知名將出書生

劉駙馬水亭避暑

千竿竹翠數蓮紅水閣虛涼玉簟空琥珀瓊紅疑漏酒
水精簾瑩更通風賜冰滿盃沈朱實法饌盈盤覆碧籠
盡月逍遙避煩暑再三珍重主人翁

述舊賀遷寄陝虢孫常侍

南宮左輔兩處交代

南宮幸襲芝蘭後左輔曾交印綬來多病未離清洛苑

新恩已歷望仙臺
關頭古塞桃林靜
城下長河竹箭回
聞道隨車有零雨
此時偏動子荆才

酬端州吳大夫夜泊湘川見寄一絕

夜泊湘川逐客心
月明猿苦血沾襟
湘妃舊竹痕猶淺
從此因君染更深

劉賓客文集卷第二十四

劉賓客文集卷第二十五

雜體詩三十九首

翠微寺有感

吾王昔遊幸離宮雲際開朱旗迎夏早涼軒避暑來湯
餅賜都尉寒冰頰上才龍髯不可望玉坐生浮埃

連州臘日觀莫徭獵西山

海天殺氣薄蠻軍部伍囂林紅葉盡變原黑草如燒圍
合繁鉦息禽興大旆搖張羅依道口嗾犬上山腰猜鷹
慮奮迅驚麋時跼跳瘴雲四面起臘雪半空消箭頭餘
鵠血鞍傍見雉翹日莫還城邑金笳發麗譙

觀舞柘枝二首

胡服何葳蕤，僊僊登綺墀。神飊獵紅蕖，龍燭然金枝。垂帶覆纖腰，安鈿當嫵眉。翹袖中繁鼓，傾眸遡華棖。燕餘有舊曲，淮南多冶詞。欲見傾城處，君看赴節時。山雞臨清鏡，石燕赴遙津。何如上客會長袖，入華茵。體輕似無骨，觀者皆聳神。曲盡回身處，曾波猶注人。

君山懷古

屬居八十一，此地阻長風。千載威靈盡，赭山寒水中。

秋江晚泊

長泊起秋色，空江涵霽暉。暮霞千萬狀，賓鴻次第飛。古戍見旗迴，荒村聞犬稀。軻峨膺上客，勸酒夜相依。

步出武陵東亭臨江寓望

鷹至感風候霜餘變林麓孤颿帶日來寒江轉沙曲戍
遙旗影動津晚榜聲促月上彩霞收漁歌遠相續

秋日送客至潛水驛

候吏立沙際田家連竹溪楓林社日鼓茅屋午時雞雀
噪晚禾地蝶飛秋草畦驛樓宮樹近疲馬再三嘶

晚歲登武陵城顧望水陸悵然有作

星象承烏翼蠻陬想犬牙俚人祠竹節仙洞開桃花城
基歷漢魏江源自竇巴華表廖王墓菜地黃瓊家霜輕
菊秀晚石淺水文斜樵音遶故壘汲路明寒沙清風稍
改葉盧橘始含葩野橋鳴驛騎叢祠發迥笳跳鱗避舉
網倦鳥寄行查路塵高出樹山火遠連霞夕曛轉赤岸

浮藹起蒼葭，軋軋渡溪槩。連連赴林鴉，叫闥道非遠。賜
環期自賒，孤臣本危涕。喬木在天涯。

湖州崔郎中曹長寄三癖詩，自言癖在詩與琴
酒。其詞逸而高，吟詠不足。昔柳吳興亭臯隴首
之句，王融書之白團扇，故爲四韻以謝之。

視事畫屏中，自稱三癖翁。管絃泛春渚，旌旆拂晴虹。酒
對青山月，琴韻白蘋風。會書團扇上，知君文字工。

爲郎分司寄上都同舍

籍通金馬門，身在銅駝陌。省闥畫無塵，宮樹遠凝碧。荒
街淺深轍，古渡潺湲石。唯有嵩丘雲，堪誇蚤朝客。

登陝州城北樓卻寄京都親友

獨上百尺樓目窮思亦愁
初日徧露草野田荒悠悠塵
息長道白林清宿煙收回首
雲深處永懷帝鄉遊

請告東歸發灞橋卻寄諸僚友

征途出灞涘回首傷如何
故人雲雨散滿目山川多
行車無停軌流景同迅波
前歡漸成昔感歎益悲歌

秋晚題湖城驛上池亭

秋次池上館林塘照南榮
塵衣紛未解幽思浩已盈
風蓮墜故萼露菊含晚英
恨爲一夕客愁聽晨雞鳴

平蔡州三首

蔡州城中眾心死
祇星夜落照河水漢家飛將下天來
馬箠一揮門洞開
賊徒崩騰望旗拜有若羣蟄驚春雷

狂童面縛登檻車太白天矯垂捷書相公從容來鎮撫
常侍郊迎負文弩四人歸業閭里間小兒跳跟健兒舞
汝南晨雞喔喔鳴城頭鼓角音和平路傍老人憶舊事
相與感激皆涕零老人收泣前致辭官軍入城人不知
忽驚元和十二載重見天寶承平時

九衢車馬渾渾流使臣來獻淮西囚四夷聞風失匕筩
天子受賀登高樓妖童擢髮不足數血污城西一抔土
南風無火楚澤閒夜行不鎖穆陵關策勳祀畢天下泰
猛士按劍看常山

時唯常山不庭

平齊行二首

胡塵昔起薊北門河南地屬平盧軍貂裘代馬繞東岳

嶧陽孤桐削爲角地形十二虜意驕恩澤含容歷四朝
魯人皆科帶弓箭齊人不復聞簫韶今朝天子聖神武
手握⑤符平九土初哀狂童襲故事文告不來方震怒
去秋詔下誅東平官軍四合猶嬰城春來羣鳥噪且驚
氣如壞山墮其庭牙門大將有劉生夜半射落欃槍星
帳中虜血流滿地門外三軍舞連臂驛騎函首過黃河
城中無賊天氣和朝廷侍郎來慰撫耕夫滿野行人歌
泰山沈寇六十年旅祭不饗生愁煙今逢聖君欲封禪
神使陰兵來助戰祆氛埽盡河水清日觀杲杲卿雲見
開元皇帝東封時百神受職爭奔馳千軍猛篋順流下
洪波涵淡浮熊羆侍臣燕公秉文筆玉檢告天無愧詞

當今叡孫承聖祖岳神望幸河宗舞青門大道屬車塵
共待葳蕤翠華舉

城西行

城西簇簇三叛族叛者爲誰蔡吳蜀中使提刀出禁來
九衢車馬轟成雷臨刑與酒椀未覆仇家白官先請肉
守吏能然董卓臍飢烏來覘桓_玄日城西人散泰街平
雨洗血痕春草生

武昌老人說笛歌

武昌老將七十餘手把庾令相問書自言少小學吹笛
蚤事曹王曾賞激往年鎮戍到蘄州楚山蕭蕭笛竹秋
當時買材恣搜索典卻身上烏貂裘古苔蒼蒼封老節

石上孤生飽風雪商聲五音隨指發水中龍應行雲絕
曾將黃鶴樓上吹一聲占盡秋江月如今老去語猶遲
音韻高低耳不知氣力已無心尙在時時一曲夢中吹

西山蘭若試茶歌

山僧後檐茶數叢春來映竹抽新茸宛然爲客振衣起
自傍芳叢摘鷹背斯須炒成滿室香便酌砌下金沙水
驟雨松聲入鼎來白雲滿盃花裴回悠揚噴鼻宿醒散
清峭徹骨煩襟開陽崖陰嶺各殊氣未若竹下莓苔地
炎帝雖嘗未解煎桐君有錄那知味新芽連拳半未舒
自摘至煎俄頃餘木蘭墜露香微似瑤草臨波色不如
僧言靈味宜幽寂采采翹英爲嘉客不辭緘封寄郡齋

甌井銅鑪損標格何況蒙山顧渚春白泥赤印走風塵
欲知花乳清冷味須是眠雲跂石人

廟庭偃松詩

并引

侍中後閣前有小松不待年而偃丞相晉公爲賦詩美
其猶龍蛇然植于高檐喬木間上嶽旁軋盤蹙傾亞似
不得天和者公以遂物性爲意乃加憐焉命畚土以壯
其趾使無敲索綯以牽其榦使不仆盥漱之飲以潤之
顧盼之輝以照之發於人心感召和氣無復天闕坐能
敷舒曩之跼蹙化爲奇古故雖褻丈而有偃號焉予嘗
詣閣白事公爲道所以且示以詩竊感嘉木之逢時斐
然成詠

勢軋枝偏根已危高情一見與扶持忽從顛顛有生意
卻爲離披無俗姿影入巖廊行樂處韻含天籟宿齋時
謝公莫道東山去待取陰成滿鳳池

答東陽于令涵碧圖詩

并引

東陽令于興宗丞相燕國公之猶子生綺襦紈袴間所
見皆貴盛而挈然有心如山東書生前年白有司願爲
親民官以自效遂補東陽及莅官以簡易爲治故多暇
日一旦於縣五里偶得奇境埋沒於翳薈中于生自以
有特操而生於公侯家由覆廕入仕常忽忽歎息因移
是心開抉泉石芟去蘿蔦斧凡材畚息壤而清溪翠巖
森立盃來因構亭其端題曰涵碧碧流貫于庭中如青

龍蜿蜒冰

去聲

澈射人樹石雲霞列于前昏旦萬狀惜其

居地不得有聞於時故圖之來乞詞既無負尤物予亦
久翳蘿蔦者睹之慨然遂賦七言以貽後之文士

東陽本是佳山水何況曾經沈隱侯化得邦人解吟詠
如今縣令亦風流新開潭洞疑仙境遠寫丹青到雍州
落在尋常畫師手猶能三伏凜生秋

贈致仕滕庶子先輩

時及第八
人中最長

朝服歸來晝錦榮登科記上更無名壽觴每使曾孫獻
勝境長攜眾妓行矍鑠據鞍時騁健殷勤把酒尙多情
凌寒卻向山陰去衣繡郎君雪裏迎

時令子爲御史
主務在越中

詠樹紅柿子

曉連星影出晚帶日光懸
本因遺采掇翻自保天年

庭竹

露滌鉛粉節風搖青玉枝
依依似君子無地不相宜

臺城懷古

清江悠悠王氣沈
六朝遺事何處尋
宮牆隱嶙圍野澤
鸛鷓夜鳴秋色深

題壽安甘棠館二首

公館似仙家池清竹逕斜
山禽忽驚起衝落半巖花
門前洛陽道門裏桃源路
塵土無煙霞其間十餘步

與歌者米嘉榮

唱得涼州意外聲
舊人唯數米嘉榮
近來時世輕先輩

好染髭須事後生

聽舊宮中樂人穆氏唱歌

曾隨織女渡天河記得雲閒第一歌
休唱貞元供奉曲
當時朝士已無多

渾侍中宅牡丹

徑尺千餘朵人間有此花
今朝見顏色更不向諸家
唐郎中宅與諸公同飲酒看牡丹

今日花前飲甘心醉數椀
但愁花有語不爲老人開
與歌者何戡

二十餘年別帝京重聞天樂不勝情
舊人唯有何戡在
更與殷勤唱渭城

與歌童田順郎

天下能歌御史娘花前月底奉君王九重深處無人見
分付新聲與順郎

燕爾館破屏風所畫至精人多歎賞題之

畫時應遇空亡日賣處難逢識別人唯有多情往來客
強將衫袖掃埃塵

賞牡丹

庭前芍藥妖無格池上芙蓉淨少情唯有牡丹真國色
花開時節動京城

寄陝州姚中丞

時分司
東都

八月天地肅二陵風雨收旌旗闕下來雲日關東秋禹

跡想前事漢臺餘故工裴回襟帶地左右帝王州留滯
悲昔老恩光榮徹侯相思望棠樹一寄商聲謳

奉酬湖州崔郎中見寄五韻

山陽昔相遇灼灼晨葩鮮同遊翰墨場和樂塤篪然一
落名宦途浩如乘風船行當衰莫日臥理淮海壖猶期
謝病後共樂桑榆年

劉賓客文集卷第二十五

劉賓客文集卷第二十六

樂府上

團扇歌

團扇復團扇奉君清暑殿
秋風入庭樹從此不相見
上有乘鸞女蒼蒼網蟲徧
明年入懷袖別是機中練

荊州歌二首

渚宮楊柳暗麥城朝雉飛
可憐蹋青伴乘煥著輕衣
今日好南風商旅相催發
沙頭檣竿上始見春江闊

紀南歌

風煙紀南城塵土荊門路
天寒多獵騎走上樊姬墓

宜城歌

野水遶空城行塵起孤驛荒臺側生樹石碣陽鐫額靡
靡渡行人溫風吹宿麥

順陽歌

朝辭官軍驛前望順陽路野水齧荒墳秋蟲鏤官樹曾
聞天寶末胡馬西南驚城守魯將軍拔城從此去

馬嵬行

綠野扶風道黃塵馬嵬驛路邊楊貴人墳高三四尺乃
問里中兒皆言幸蜀時軍家誅佞倖天子捨妖姬羣吏
伏門屏貴人牽帝衣低回轉美目風日爲無暉貴人飲
金屑倏忽薜英莫平生服杏丹顏色其如故屬車塵已
遠里巷來窺覷共愛宿妝妍君王畫眉處履綦無復有

履組光未滅不見岩畔人空見淩波韞郵童愛蹤跡私
手解槃結傳看千萬眼縷絕香不歇指環照骨明首飾
敵連城將入咸陽市猶得賈胡驚

視刀環歌

常恨言語淺不如人意深今朝兩相視脈脈萬重心

三閣辭四首

吳聲

貴人三閣上日晏未梳頭不應有恨事嬌甚卻成愁
珠箔曲瓊鉤子細見揚州北兵那得度浪語判悠悠
沈香帖閣柱金縷畫門楣回首降幡下已見黍離離
三人出胷井一身登檻車朱門漫臨水不可見鱸魚

更衣曲

博山烟烟吐香霧紅燭引至更衣處夜如何其夜漫漫
鄰雞未鳴寒雁度庭前雪壓松桂叢廊下點點懸紗籠
滿堂醉客爭笑語嘈噴琵琶青幕中

淮陰行五首

并引

古有長干行言三江之事悉矣余嘗阻風淮陰作淮陰
行以裨樂府

簇簇淮陰市竹樓緣岸上好日起檣竿烏飛驚五兩
今日轉船頭金烏指西北煙波與春草千里同一色
船頭大銅鑲摩挲光陳陳蚤晚使風來沙頭一眼認
何物令儂羨羨郎船尾燕銜泥趁檣竿宿食長相見
隔浦望行船頭昂尾嚳嚳無奈晚來時清淮春浪軟

競渡曲

競渡始於武陵至今舉楫而相和之其音咸呼云何在斯招屈之義事見圖經

沅江五月平隄流
邑人相將浮綵舟
靈均何年歌已矣
哀謠振楫從此起
揚枹擊節雷闐闐
亂流齊進聲轟然
蛟龍得雨鬣鬣動
蟠螭飲河形影聯
刺史臨流拳翠幃
揭竿命爵分雄雌
先鳴餘勇爭鼓舞
未至銜枚顏色沮
百勝本自有前期
一飛由來無定所
風俗如狂重此時
縱觀雲委江之湄
綵旗夾岸照鮫室
羅幃淩波呈水嬉
曲終人散空愁莫
招屈亭前水東注

隄上行三首

酒旗相望大隄頭
隄下連檣隄上樓
日莫行人爭渡急
槳聲幽軋滿中流

江南江北望煙波入夜行人相應歌桃葉傳情竹枝怨
水流無限月明多

長隄繚繞水徘徊酒舍旗亭次第開日晚出簾招估客
軻毳大編落颿來

采菱行

武陵俗嗜采菱歲秋矣有女郎盛遊于馬湖薄言采之歸以御客古有采菱曲

罕傳其詞故賦之以俟采詩者

白馬湖平秋日光紫菱如錦綵鴛翔盪舟遊女滿中央
采菱不顧馬上郎爭多逐勝紛相向時轉蘭橈破輕浪
長鬟弱袂動參差釵影釧文浮蕩漾笑語哇咬顧晚暉
蓼花緣岸扣船歸歸來共到市橋步野蔓繫船萍滿衣
家家竹樓臨廣陌下有連檣多估客攜觴薦芰夜經過

醉蹋大隄相應歌屈平祠下沉江水月照寒波白煙起
一曲南音此地聞長安北望三千里

秋風引

何處秋風至蕭蕭送雁羣朝來入庭樹孤客最先聞

莫徭歌

莫徭自生長名字無符籍市易雜鮫人婚姻通木客星
居占泉眼火種開山脊夜渡千仞谿含沙不能射

蠻子歌

蠻語鉤輈音蠻衣斑爛布熏狸掘沙鼠時節祠盤瓠忽
逢乘馬客况若驚麕顧腰斧上高山意行無舊路

洞庭秋月

洞庭秋月生湖心曾波萬頃如鎔金孤輪徐轉光不定
遊氣濛濛隔寒鏡是時白露三秋中湖平月上天地空
岳陽城頭莫角絕蕩漾已過君山東山城蒼蒼夜寂寂
水月逶迤繞城白盪槩巴童歌竹枝連檣估客吹羌笛
勢高夜久陰力全金氣肅肅開星躔浮雲野馬歸四裔
首冠星斗當中天天雞相呼曙霞出劔影含光讓朝日
日出喧喧人不閑夜來清景非人間

蹋歌詞四首

春江月出大隄平隄上女郎連袂行唱盡新詞歡不見
紅霞暎樹鷓鴣鳴

桃蹊柳陌好經過鐙下妝成月下歌爲是襄王故宮地

至今猶自細腰多

新詞宛轉遞相傳
振袖傾鬟風露前
月落烏啼雲雨散
遊童陌上拾花鈿

日暮江南聞竹枝
南人行樂北人悲
自從雪裏唱新曲
直到三春花盡時

華清詞

日出驪山東
裴回照溫泉
樓臺影玲瓏
稍稍開白煙
言昔太上皇
寄居此祈年
風中聞清樂
往往來列仙
翠華入五雲
紫氣歸上玄
哀哀生人淚
泣盡弓劒前
聖道本自我
凡情徒駢然
小臣感玄化
一望青冥天

步虛詞二首

阿母種桃雲海際花落子成二千歲海風吹折最繁枝
跪捧瓊漿獻天帝

華表千年一鶴歸凝丹爲頂雪爲衣星星仙語人聽盡
卻向五雲翻翅飛

桃源行

漁舟何招招浮在武陵水拖綸擲餌信流去誤入桃源
行數里清源尋盡花緜緜蹋花覓逕至洞前洞門蒼黑
煙霧生暗行數步逢虛明俗人毛骨驚仙子爭來致詞
何至此須臾皆破冰雪顏笑言委曲問人閒因嗟隱身
來種玉不知人世如風燭筵羞石髓勸客餐鐙爇松脂
留客宿雞聲犬聲遙相聞曉光蔥籠開五雲漁人振衣

起出戶滿庭無路花紛紛翻然恐迷鄉縣處一息不肯
桃源住桃花滿溪水似鏡塵心如垢洗不去仙家一出
尋無蹤至今水流山重重

魏宮詞二首

日晚長秋簾外報望陵歌舞在明朝添鑪火欲熏衣麝
憶得分明不忍燒

日映西陵松柏枝下臺相顧一相悲朝來樂府長歌曲
唱著君王自作詞

阿嬌怨

望見葳蕤舉翠華試開金屋鎖庭花須臾宮女傳來信
言幸平陽公主家

九華山 并引

九華山在池州青陽縣西南九峯競秀神采奇異昔子
仰太華以爲此外無奇愛女儿荆山以爲此外無秀及
今見九華始悼前言之容易也惜其地偏且遠不爲世
所稱故歌以大之

奇峯一見驚魂魄意想洪鑪始開闢疑是九龍夭矯欲
攀天忽逢霹靂一聲化爲石不然何至今悠悠億萬年
氣勢不死如騰仝音騫輕舉貌雲含幽兮月添冷日凝輝兮

江漾影結根不得要路津迴秀長在無人境軒皇封禪
登雲亭大禹會計臨東溟乘櫟力追反山行貌不來廣樂絕獨

與猿鳥愁青熒君不見敬亭之山黃索漠兀如斷岸無

稜角宣城謝守一首詩遂使名聲齊五岳九華山九華山自是造化一尤物焉能籍甚乎人間

送春曲

春向晚春晚思悠哉風雲日已改花葉自相催漠漠空中去何處天際來
春已暮冉冉如人老映葉見殘花連天是青草可憐桃與李從此同桑棗
春景去此去何時回遊人千萬恨落日上高臺寂寞繁花盡流鶯歸不來

初夏曲三首

銅壺方促夜斗柄暫南回稍嫌單衣重初憐北戶開西

園花已盡新月爲誰來
時節過繁華陰陰千萬家
巢禽命子戲園果墜枝斜
寂寞孤飛蝶窺叢覓晚花

綠水風初煖青林露早晞
麥田雉朝雒桑野人暮歸
百舌悲花盡無聲來去飛

柳花詞三首

開從綠條上散逐香風遠
故取花落時悠揚占春晚
輕飛不假風輕落不委地
撩亂舞晴空發人無限思
晴天黯黯雪來送青春
暮無意似多情千家萬家去

送春詞

昨來樓上迎春處今日登樓又送歸
蘭麝殘妝含露泣


柳條長袖向風揮
佳人對鏡容色改
楚客臨江心事違
萬古至今同此恨
無如一醉盡忘機

秋詞二首

自古逢秋悲寂寥
我言秋日勝春朝
晴空一鶴排雲上
便引詩情到碧霄

山明水淨夜來霜
數樹深紅出淺黃
試上高樓清入骨
豈知春色嗾人狂

劉賓客文集卷第二十六



劉賓客文集卷第二十七

樂府下

泰娘歌 并引

泰娘本韋尙書家主謳者初尙書爲吳郡得之命樂工
誨之琵琶使之歌且舞無幾何盡得其術居一二歲攜
之以歸京師京師多新聲善工於是又捐去故伎以新
聲度曲而泰娘名字往往見稱於貴遊之間元和初尙
書薨於東京泰娘出居民間久之爲蘄州刺史張恣所
得其後恣坐事謫居武陵郡恣卒泰娘無所歸地荒且
遠無有能知其容與藝者故日抱樂器而哭其音焦殺
以悲雒客聞之爲歌其事以足乎樂府云

泰娘家本閭門西門前綠水環金隄有時妝成好天氣
走上皋橋折花戲風流太守韋尙書路傍忽見停隼旟
斗量明珠烏傳意紺幘迎入專城居長鬟如雲衣似霧
錦茵羅薦承輕步舞學驚鴻水榭春歌撩上客蘭堂莫
從郎西入帝城中貴遊簪組香簾櫳低鬟緩視抱明月
纖指破撥生胡風繁華一旦有消歇題劔無光履聲絕
洛陽舊宅生草萊杜陵蕭蕭松柏哀妝奩蟲網厚如繭
博山鑪側傾寒灰蘄州刺史張公子白馬新到銅駝里
自言買笑擲黃金月墮雲中從此始安知鵬鳥坐隅飛
寂寞旅魂招不歸秦嘉鏡有前時結韓壽香銷故篋衣
山城少人江水碧斷雁哀猿風雨夕朱弦已絕爲知音

雲鬢未秋私自惜舉目風煙非舊時夢尋歸路多參差
如何將此千行淚更灑湘江斑竹枝

秋扇詞

莫道恩情無重來人間榮謝遞相催當時初入君懷袖
豈念寒鑪有死灰

擣衣曲

爽砧應秋律繁杵含淒風一一遠相續家家音不同戶
庭凝露清伴侶明月中長裾委襞積輕珮垂璫瓏汗餘
衫更馥鈿移麝半空報寒驚邊雁促思聞候蟲天狼正
芒角虎落定相攻盈篋寄何處征人如轉蓬

七夕二首

河鼓靈旗動姮娥破鏡斜滿空天是幕徐轉斗爲車機
罷猶安石橋成不礙槎雷知觀津女竟夕望雲涯
天衢啟雲帳神馭上星橋初喜渡河漢頻驚轉斗杓餘
霞張錦幃輕電閃紅綃非是人間世還悲後會遙

龍陽縣歌

縣門白日無塵土百姓縣前挽魚罟主人引客登大隄
小人縱觀黃犬怒鷓鴣驚鳴遶籬落橘柚垂芳照窗戶
沙平草綠見吏稀寂寥斜陽照懸鼓

度桂嶺歌

桂陽嶺下下復高高人稀鳥獸駭地遠草木豪寄言千
金子知余歌者勞

插田歌 并引

連州城下俯接村墟偶登郡樓適有所感遂書其事爲
俚歌以俟采詩者

岡頭花草齊燕子東西飛田塍望如線白水光參差農
婦白紵裙農夫綠蓑衣齊唱田中歌嚶備如竹枝但聞
怨響音不辨俚語詞時時一大笑此必相嘲嗤水平苗
漠漠煙火生墟落黃犬往復還赤雞鳴且啄路傍誰家
郎烏帽衫袖長自言上計吏年初離帝鄉田夫詰計吏
君家儂定諳一來長安罷眼大不相參計吏笑致辭長
安真大處省門高軻峨儂入無度數昨來補衛士唯用
筒竹布君看二三年我作官人去

畚田作

何處好畚田團團縵山腹鑽龜得雨卦上山燒臥木驚
麈走且顧羣雉聲咿啞紅燄遠成霞輕煤飛入郭風引
上高岑獵獵度青林青林望靡靡赤光低復起照潭出
老蛟爆竹驚山鬼夜色不見山孤明星漢閒如星復如
月俱逐曉風滅本從敲石光遂致烘天熱下種煖灰中
乘陽坼芽萼蒼蒼一雨後苕穎如雲發巴人拱手吟耕
耨不關心由來得地勢徑寸有餘陰

蒲桃歌

野田生蒲桃纏繞一枝蒿移來碧墀下張王日高高分
岐浩繁縟脩蔓蟠詰曲揚翹向庭柯意思如有屬爲之

立長架布漚當軒綠米液漑其根理疏看滲漉繁葩組
綬結懸實珠璣蹙馬乳帶輕霜龍鱗躍初旭有客汾陰
至臨堂瞪雙目自言我晉人種此如種玉釀之成美酒
令人飲不足爲君持一斗往取涼州牧

鷓鴣吟

朝陽有吟鳳不聞千萬祀鷓鴣催眾芳晨閒先入耳秋
風白露晞從是爾啼時如何上春日唧唧滿庭飛

牆陰歌

白日左右浮天潢朝晡影入東西牆昔爲兒童在陰戲
當時意小覺日長東鄰侯家吹笙簧隨陰促促移象牀
西鄰田舍乏糟糠就影汲汲春黃梁因思九州四海外

家家只占牆陰內莫言牆陰數尺間老卻主人如等閒
君看眼前光景促中心莫學太行山

觀雲篇

興雲感陰氣疾走如見機晴來意態行有若功成歸蔥
龍含晚景潔白凝秋暉夜深度銀漢漠漠仙人衣

沓潮歌

并引

元和十年夏五月終風駕濤南海羨溢南人曰沓潮也
率三更歲一有之余爲連州客或爲予言其狀因歌之
附于南越志

屯門積日無回颿滄波不歸成沓潮轟如鞭石砧且搖
互空欲駕鼉鼉橋驚湍蹙縮悍而驕大陵高岸失容堯

四邊無阻音響調背負元氣掀重霄介鯨得性方逍遙
仰鼻噓吸揚朱翹海人狂顧迭相招剝衣鬚首聲曉曉
征南將軍登麗譙赤旗指麾不敢躡翌日風回沴氣消
歸濤納納景昭昭烏泥白沙復滿海海色不動如青瑤

百花行

長安百花時風景宜輕薄無人不沾酒何處不聞樂長
安連夜動微雨陵曉濯紅燄出牆頭雪花映樓角繁紫
韻松竹遠黃遶籬落臨路不勝愁輕飛去何託滿庭蕩
魂魄照廡成丹渥爛漫嗾顛狂飄零勸行樂時節易晚
晚清陰覆池閣唯有安石榴當軒慰寂寞

春有情篇

爲問遊春侶春情何處尋
花含欲語意草有鬪生
心雨頻催發色雲輕不作陰
縱令無月夜芳興暗中深

路傍曲

南山宿雨晴春入鳳皇城
處處聞弦管無非送酒聲

白鷺兒

白鷺兒最高格毛衣新成雪
不敵眾禽喧呵獨凝寂孤
眠芊芊草久立潺潺石前山
正無雲飛去入遙碧

壯士行

陰風振寒郊猛虎正咆哮
徐行出燒地連吼入黃茅壯
士走馬去鐙前彎玉弣叱之
使人立一發如鉞交悍睛
忽星墮飛血濺林梢彪炳爲
我席羶腥充我庖里中欣

害除賀洒紛號呶明日長橋上傾城看斬蛟

邊風行

邊馬蕭蕭鳴邊風滿磧生暗添弓箭力斗上鼓鼙聲襲

月寒風起吹雲陰陳成將軍占氣候出號夜翻營一作寒號

畏翻城

竹枝詞 并序

四方之歌異音而同樂歲正月余來建平里中兒聯歌
竹枝吹短笛擊鼓以赴節歌者揚袂睢舞以曲多為賢
聆其音中黃鐘之羽卒章激訐如吳聲雖儉備不可分
而含思宛轉有淇澳之豔昔屈原居沅湘間其民迎神
詞多鄙陋乃為作九歌到于今荆楚鼓舞之故余亦作

竹枝詞九篇俾善歌者颺之附于末後之聆巴歛知變
風之自焉

白帝城頭春草生白鹽山下蜀江清南人上來歌一曲
北人陌上動鄉情

山桃紅花滿上頭蜀江春水拍山流花紅易衰似郎意
水流無限似儂愁

江上朱樓新雨晴瀼西春水縠文生橋東橋西好楊柳
人來人去唱歌行

日出三竿春霧消江頭蜀客駐蘭橈憑寄狂夫書一紙
住在成都萬里橋

兩岸山花似雪開家家春酒滿銀杯昭君坊中多女伴

永安宮外踏青來

城西門前灩澦堆年年波浪不能摧
懊恨人心不如石少時東去復西來

瞿唐嘈嘈十二灘此中道路古來難
長恨人心不如水等閒平地起波瀾

巫峽蒼蒼煙雨時清猿啼在最高枝
箇裏愁人腸自斷由來不是此聲悲

山上層層桃李花雲間煙火是人家
銀釧金釵來負水長刀短笠去燒畬

楊柳枝詞九首

塞北梅花羌笛吹淮南桂樹小山詞
請君莫奏前朝曲

聽唱新翻楊柳枝

南陌東城春蚤時相逢何處不依依桃紅李白皆誇好
須得垂楊相發揮

鳳闕輕遮翡翠幃龍池遙望麴塵絲御溝春水相輝映
狂殺長安年少兒

金谷園中鶯亂飛銅駝陌上好風吹城中桃李須臾盡
爭似垂楊無限時

花萼樓前初種時美人樓上鬪腰支如今拋擲長街裏
露葉如啼欲恨誰

煬帝行宮汴水濱數株殘柳不勝春晚來風起花如雪
飛入宮牆不見人

御陌青門拂地垂千條金縷萬條絲如今縮作同心結
將贈行人知不知

城外春風吹酒旗行人揮袂日西時長安陌上無窮樹
唯有垂楊縮別離

輕盈嫋娜占年華舞榭妝樓處處遮春盡絮飛留不得
隨風好去落誰家

浪淘沙詞九首

九曲黃河萬里沙浪淘風簸自天涯如今直上銀河去
同到牽牛織女家

洛水橋邊春日斜碧流輕淺見瓊砂無端陌上狂風急
驚起鴛鴦出浪花

汴水東流虎眼文
清淮曉色鴨頭春
君看渡口淘沙處
渡卻人間多少人

鸚鵡舟頭浪颭沙
青樓春望日將斜
銜泥燕子爭歸舍
獨自狂夫不憶家

濯錦江邊兩岸花
春風吹浪正淘沙
女郎翦下鴛鴦錦
將向中流正晚霞

日照澄洲江霧開
淘金女伴滿江隈
美人首飾侯王印
盡是沙中浪底來

八月濤聲吼地來
頭高數丈觸山回
須臾卻入海門去
捲起沙堆似雪堆

莫道讒言如浪深
莫言遷客似沙沈
千淘萬灑雖辛苦

吹盡狂沙始到金

流水淘沙不暫停前波未滅後波生令人忽憶瀟湘渚
回唱迎神三兩聲

瀟湘神二首

湘水流湘水流九疑雲物至今愁君問二如何處所零
陵香草露中秋

斑竹枝斑竹枝淚痕點點寄相思楚客欲聽瑤瑟怨瀟
湘深夜月明時

拋毬樂詞二首

五綵繡團圓登君瑋筵最宜紅燭下偏稱落花前上
客如先起應須贈一船

春蚤見花枝朝朝恨發遲及看花落後卻憶未開時幸
有拋毬樂一楮君莫辭

楊柳枝詞二首

迎得春光先到來淺黃輕綠映樓臺只緣裊娜多情思
便被春風長挫摧

巫峽巫山楊柳多朝雲暮雨遠相和因想陽臺無限事
爲君回唱竹枝歌

竹枝詞二首

楊柳青青江水平聞郎江上唱歌聲東邊日出西邊雨
道是無情還有晴


楚水巴山江雨多巴人能唱本鄉歌今朝北客思歸去

回入紇那披綠羅

紇那曲詞二首

楊柳鬱青青竹枝無限情周郎一回顧聽唱紇那聲
蹋曲興無窮調同詞不同願郎千萬壽長作主人翁
右已上詞先不入集伏緣播在樂章今附于卷末

劉賓客文集卷第二十七



劉賓客文集卷第二十八

送別四十六首

送工部張侍郎入蕃弔祭

時張兼脩史

月窟賓諸夏雲官降九天
飾終鄰好重錫命禮容全
水咽猶登隴沙鳴稍極邊
路因乘駟近志為飲冰堅
毳帳差池見烏旗搖曳前
歸來賜金石榮耀自編年

蚤秋送臺院楊侍御歸朝

兄弟四人徧歷諸科二人同在省

仙署棣華春當時已絕倫
今朝丹闕下更入白眉人
重振高陽族分居要路津
一門科第足五府辟書頻
鷲鳥得秋氣法星懸火曼
聖朝寰海靜所至不埋輪

送工部蕭郎中刑部李郎中並以本官兼中丞

分命充京西京北覆糧使

霜簡映金章相輝同舍郎天威巡虎落星使出鴛行尊
組成全策京坻閱見糧歸來虜塵滅畫地奏明光

送李尙書鎮滑州

自浙西觀察徵拜兵部侍郎月餘有此拜

南徐報政入文昌東郡須才別建章視草名高同蜀客
擁旄年少勝荀郎黃河一曲當城下緹騎千重照路傍

自古相門還出相如今人望在巖廊

其後果繼韋平之族

送渾大夫赴豐州

自大鴻臚拜家承舊勳

鳳銜新詔降恩華又見旌旗出渾家故吏來辭辛屬國
精兵願逐李輕車氈裘君長迎風懼錦帶酋豪蹋雪衙
其奈明年好春日無人喚看牡丹花

送源中丞充新羅冊立使

侍中
之孫

相門才子稱華簪持節東行捧德音身帶霜威辭鳳闕
口傳天語到雞林煙開鰲背千尋碧日浴鯨波萬頃金
想見扶桑受恩後一時西拜盡傾心

送陸侍御歸淮南使府五韻

用年
字

江左重詩篇陸生名久傳鳳城來已熟羊酪不嫌羶歸
路芙蓉府離堂瑋瑁筵泰山呈臘雪隋柳布新年曾忝
揚州薦因君達短牋

時段丞相鎮揚
州嘗辱表薦

送太常蕭博士棄官歸養赴東都

時元兄罷相
為少師仲兄

為郎官並
分司洛邑

兄弟盡鴛鴦歸心切問安貪榮五采服遂挂兩梁冠侍

膳會調鼎循咳更握蘭從今別君後長向德星看

送王司馬之陝州

自太常丞授王爲詩

暫輟清齋出太常空攜詩卷赴甘棠府公既有朝中舊
司馬應容酒後狂案牘來時唯署字風煙入興便成章
兩京大道多遊客每遇詞人戰一場

洛中送楊處厚入關便遊蜀謁韋令公

洛陽秋日正淒淒君去西秦更向西舊學三冬今轉富
曾傷六翮養初齊王城曉入窺丹鳳蜀路晴來見碧雞
蚤識臥龍應有分不妨從此躡丹梯

洛中逢韓七中丞之吳興口號五首

昔年意氣結羣英幾度朝回一字行海北天南零落盡

兩人相見洛陽城

自從雲散各東西每日歡娛卻慘悽
離別苦多相見少
一生心事在書題

今朝無意訴離杯何況清弦急管催
本欲醉中輕遠別
不知翻引酒悲來

駱駝橋上蘋風起鸚鵡杯中箬雨春
水碧山青知好處
開顏一笑向何人

溪中士女出笆籬溪上鴛鴦避畫旗
何處人間似仙境
春山攜妓采茶時

送周使君罷渝州歸郢州別墅

君思郢上吟歸去故自渝南擲郡章
野戍岸邊留畫舸

綠蘿陰下到山莊池荷雨後衣香起庭草春深綬帶長
只恐鳴騶催上道不容待得晚菘嘗

發華州留別張侍御

賈一作

束簡下延閣買符驅短轅同人惜分袂結念醉芳尊切
切別弦思蕭蕭征騎煩臨岐無限意相視卻忘言

張詩云夫

子生知者相期妙理中遂有忘言之句

奉送家兄歸王屋山隱居二首

據道書王屋山一名陽洛山

陽洛天壇上依稀似玉京夜分先見日月靜遠聞笙雲
路將雞犬丹臺有姓名古來成道者兄弟亦同行

春來山事好歸去憶逍遙水淨苔莎色露香芝朮苗登
臺吸瑞景飛步翼神飆願薦填篋曲相將學玉簫

送王師魯協律赴湖南使幕

即永穆公之孫

翩翩馬上郎驅傳渡三湘橘樹沙洲暗松醪酒肆香素
風傳竹帛高價騁琳琅楚水多蘭若何人事擷芳

別友人後得書因以詩贈

前時送君去揮手青門橋路轉不相見猶聞馬蕭蕭今
得出關書行塵日已遙春還遲君至共纈芳蘭苕

奉送浙江李僕射相公赴鎮

奉送至臨泉驛書禮見徵拙詩時在

汝州

建節東行是舊遊歡聲喜氣滿吳州郡人重得黃丞相
童子爭迎郭細侯詔下初辭温室樹夢中先到景陽樓
自憐不識平津閣遙望旌旗汝水頭

重送浙西李相公頃廉問江南已經七載後歷
滑臺劔南兩鎮遂入相今復領舊地新加旌旄
江北萬人看玉節江南千騎引金饒鳳從池上遊滄海
鶴到遼東識舊巢城下清波含百谷窗中遠岫列三茅
碧雞白馬回翔久卻憶朱方是樂郊

送華陰尉張苕赴邕府使幕

張卽燕公之孫
頃坐事除名

昔忝南宮節往來東觀頻嘗披燕文傳聳若窺三辰翊
聖崇國本保賢正朝倫高視緬今古清風負無鄰蘭錡
照通衢一家十朱輪鄴國嗣侯絕韋卿世業貧夫子承
大名少年振芳塵青袍仙掌下矯首凌煙長公冶本非
罪潘郎一爲民風霜苦搖落堅白無緇磷一旦逢良時

天光燭幽淪重爲長裾客佐彼觀風臣分野窮禹畫人
煙過虞巡不言此行遠所樂相知新雨起巫山陽鳥鳴
湘水濱離筵出蒼莽別曲多悲辛今朝一椀酒明日千
里人彼此孤舟去悠悠天海春

送湘陽熊判官孺登府罷歸鍾陵因寄呈江西

裴中丞二十三兄

射策志未就從事府云除篋留馬卿賦袖有劉弘書忽
見夏木深悵然憶吾廬復持州民刺歸謁專城居君家
誠易知勝絕傾里閭人言北郭生門有卿相輿鍾陵藹
千里帶郭西江水朱檻照河宮旗亭綠雲裏前年初缺
守慎簡由宸扆臨軒弄郡章得人方付此是時左馮翊

天下第一理貴臣持牙璋優詔發青紙迎風汚吏免先
令疲人喜何武劾腐儒陳蕃禮高士昔升君子堂腰下

綬猶黃中丞時為萬年尉汾陰有寶氣赤堊多奇鉞束簡下曲

臺佩韃來歷陽綺筵陪一笑蘭室襲餘芳風水忽異勢

江湖遂相忘因君儻借問為話長滄浪中丞為博士製相國柳宜城諡

議識者躋之頃授子以其本厥後牧和州節度使杜司徒以中丞材譽俱高欲全軍裝以重戎府故授以本州

團練使滿座觀腰韃禮成驩甚相視而笑後房燕樂卜夜縱談子忝司徒之賓時獲未坐初中丞自尚書屯田

員外郎出守踵其武者今給事中穆公代給事者右丞段公子不佞繼右丞之後故曰襲餘芳焉

送韋秀才道冲赴制舉

驚禽一辭巢棲息無少安秋扇一離手流塵蔽霜紈故
侶不可追涼風日已寒遠逢杜陵士別盡平生歡逐客

無印綬楚江多芷蘭因君時暇遊長鋏不復彈閱書南
軒霽絙瑟清夜闌萬境身外寂一楮腹中寬伊昔_(玄)宗
朝冬卿冠鴛鸞肅穆升內殿從容領儒冠游夏無措詞
陽秋垂不刊至今羣玉府學者空縱觀世人希德門揭
若攀峯巒之子向明訓鏘如振琅玕一旦西上書班衣
拂征鞍荆臺宿暮雨漢水浮春瀾君門起天中多士如
星攢煙霞覆雙闕扑舞羅千官清漏滴銅壺仙廚下雕
槃熒煌仰金榜錯落濡飛翰古來長策人所歎遭時難
一鳴從此始相望青雲端

送李策秀才還湖南因寄幕中親故兼簡衡州

呂八郎中

深春風日淨爭長幽鳥鳴僕夫前致辭門有白面生攝
衣相問訊解帶坐南榮端志見眉睫苦言發精誠因出
懷中文調孤詞亦清悄如促柱弦掩抑多不平乃言本
蜀士世降岷山靈前人秉懿文高視來上京曳綬司徒
府所從信國禎析薪委空林善響難繼聲何處翳附郭
幾人思郈成雲天望喬木風水悲流萍前與計吏西始
列貢士名森然就筆札從試春官卿帝城歧路多萬足
伺晨星茫茫風塵中工拙同有營寒女勞夜織山苗榮
寸莖侯門方擊鐘衣褐誰將迎弱羽果摧頽壯心鬱怛
怛諒無蟠木容聊復蓬累行昨日訊靈龜繇言利艱貞
當求捨拔中必在審已明誓將息薄遊焦思窮筆精蒔

蘭在幽渚安得揚棊馨曰余摧落者散質負華纓一聆
苦辛詞再動伊鬱情身棄言不動愛才心尙驚恨無羊
角風使爾化北溟論罷情益親涉旬忘歸程日攜邑中
客閒眺江上城晝渴命金罍宵談轉璿衡蕙風香塵尾
月露濡桃笙忽被戒羸驂薄言事南征火雲蔚千里旅
思浩已盈湘江含碧虛衡嶺浮翠晶豈伊山水異適與
人事并油幕似崑正粲然疊瑤瓊庾樓見清月孔坐多
綠醺復有衡山守本自雲龍庭至和在靈府發越侔咸
英一麾出滎陽惠彼嗤嗤氓隼旃辭灞水居者皆涕零
惟昔與伊人交歡在夙齡一從雲雨散滋我鄙恹萌北
渚不堪愁南音誰復聽離憂若去水浩漾無時停嘗聞

祝融峯上有神禹銘古石琅玕姿祕文螭虎形聖功奠
遠服神物擁休禎賢人在其下仿像疑蓬瀛君行厯郡
齋大袂拂雙旌飾容遇朗鑒肝鬲可以呈昔日馬相如
臨邛坐盡傾勉君刷羽翰蚤取凌青冥

送張盥赴舉

并引

古人以偕受學爲同門友今人以偕升名爲同年友其
語熟見縉紳者皆道焉余於張盥爲友文人由是道也
曩吾見爾之始生以老成爲祝今吾見爾之成人以未
立爲憂吾不幸嚮所謂同年友當其盛時聯袂齊鑣互
絕九衢若屏風然今來落落如曙星之相望借曰會合
不煩異席可長太息哉然而尙書右丞衛大受兵部侍

郎武庭碩二君者當時偉人咸萬夫之望足以訂十朋
之多也第如京師無騷騷爾無忻忻爾時秋也吾爲若
叩商之謳幸有感夫二君子

爾生始懸弧我作坐上賓引箸舉湯餅祝詞天麒麟今
成一丈夫坎坷愁風塵長裾來謁我自號廬山人道舊
與撫孤悄然傷我神依依見眉睫嘿嘿含悲辛永懷同
年友追想出谷晨三十二君子齊飛凌煙旻曲江一會
時後會已彫淪況今三十載閱世難重陳盛時一已過
來者日日新不如搖落樹重有明年春火後見琮璜霜
餘識松筠肅機乃獨秀武部亦絕倫爾今持我詩西見
二重臣成賢必舊念保貴在安貧清時爲情節氣力侔

陶鈞乞取斗升水因之雲漢津

送裴處士應制舉

并序

晉人裴昌禹讀書數千卷於周官小戴禮尤邃性是古
敢言雖侯王不能卑下故與世相參差凡抵有位以素
合行天下幾

戶依反

徧常歎諸侯莫可遊欲一見天子而

未有路會今年詔書徵賢良昌禹大喜以爲可以盡豁
平生搏髀爵躍曰一觀雲龍庭足矣繇是裹三月糧而
西徂咨余以七言爲遊之資藉耳

裴生久在風塵裏氣勁言高少知己注書曾學鄭司農
歷國多於孔夫子往年訪我到連州無窮絕境終日遊
登山雨中試蠟屐入洞夏裏披貂裘白帝城邊又相遇

斂翼三年不飛去忽然結束如秋蓬自稱對策明光宮
人言策中說何事掉頭不答看飛鴻彤庭翠松迎曉日
鳳銜金榜雲間出中貴腰鞭立傾酒宰臣委佩觀搖筆
古稱射策如彎弧一發偶中何時無由來草澤無忌諱
努力滿挽當雲衢憶得童年識君處嘉禾驛後聯牆住
垂鉤鬪得王餘魚蹋芳共登蘇小墓此事今同夢想閒
相看一笑且開顏老大希逢舊鄰里爲君扶病到方山

和州送錢侍御自宣州幕拜官便於華州覲省

五綵繡衣裳當年正相稱春風舊關路歸去真多興蘭

咳行可采蓮府猶回瞪楊家紺幘迎侍御卽王相公貴婿謝守瑤

華贈宣州崔相公御街草泛濫臺柏煙含疑曾是平昔

有詩贈行

遊無因理歸乘

將赴汝州途出浚下留辭李相公

長安舊遊四十載鄂渚一別十四年後來富貴已零落
歲寒松柏猶依然初逢貞元尙文主雲闕天池共翔舞
相看卻數六朝臣屈指如今無四五夷門天下之咽喉
昔時往往生瘡疣聯翩舊相來鎮壓四海吐納皆通流
久別凡經幾多事何由說得平生意千思萬慮盡如空
一笑一言真可貴世閒何事最殷勤白頭將相逢故人
功成名遂會歸老請向東山爲近鄰

送令狐相公自僕射出鎮南梁

夏木正陰成戎裝出帝京沾襟辭闕淚回首別鄉情雲

樹裛中路風煙漢上城前旌轉谷去後騎蹋橋聲久領
鴛行重無嫌虎綬輕終當提一筆再入副蒼生

送趙中丞自司金外郎轉官參山南令狐僕射

幕府

趙氏兄弟皆僕射門客

綠樹滿裛斜西南蜀路賒驛門臨白社縣道過黃花相
府開油幕門生逐絳紗行看布政後還從入京華

奉送裴司徒令公自東都留守再命太原

本封晉國

公兩任相去十六年

星使出關東兵符賜上公山河歸舊國管籥換離宮行

色旌旗動軍聲鼓角雄愛棠餘故吏騎竹見新童漢壘

三秋靜胡沙萬里空空餘天下望旦夕詠清風

奉送李戶部侍郎自河南尹再除本官歸闕

昔年內署振雄詞今日東都結去思
宮女猶傳洞簫賦國人先詠袞衣詩
華星卻復文昌位別鶴重歸太乙池
想到金門待通籍一時驚喜見風儀

送蘄州李郎中赴任

楚關蘄水路非賒東望雲山日夕佳
薤葉照人呈夏簟松花滿盃試新茶
樓中飲興因明月江上詩情爲晚霞
北地交親長引領蚤將玄鬢到京華

洛中春末送杜錄事赴蘄州

尊前花下長相見明日忽爲千里人
君過午橋回首望洛城猶自有殘春

夜宴福建盧侍御宅因送之鎮

暫駐旌旗洛水隄
綺筵紅燭醉蘭闈
美人美酒長相逐
莫怕猿聲發建溪

洛中送崔司業使君扶持赴唐州

綠野方城路殘春
柳絮飛風鳴驪馬
日照老萊衣洛苑
魚書至江村雁戶
歸相思望淮水雙
鯉不應稀

送河南皇甫少尹赴絳州

祖帳臨周道前旌
指晉城午橋羣吏
散亥字老人迎詩
酒同行樂別離方
見情從茲洛陽社
吟詠欠書生

送前進士蔡京赴學究科

時舊相楊尚書掌選

耳聞戰鼓帶經鋤
振發名聲自里閭
已是世間能賦客

更攻窗下絕編書朱門達者誰能識絳帳書生盡不如
幸遇天官舊丞相知君無翼上空虛

送唐舍人出鎮閩中

暫辭鴛鷺出蓬瀛忽擁貔貅鎮粵城閩嶺夏雲迎阜蓋
建溪秋樹映紅旌山川遠地由來好富貴當年別有情
了卻人間婚嫁事復歸朝右作公卿

送盧處士歸嵩山別業

世業嵩山隱雲深無四鄰藥爐燒姹女酒甕貯賢人曉
日華陰霧秋風函谷塵送君從此去鈴閣少談賓

送李友路秀才赴舉

誰憐相門子不語望秋山生長綺紈內辛勤筆硯間榮

親在名字好學棄官班佗俟明年桂高堂開笑顏

送國子令狐博士赴興元覲省

相門才子高陽族學省清資五品官諫院過時榮棣萼
謝庭歸去蹋芝蘭山頭花帶煙嵐晚棧底江涵雪水寒
伯仲到家人盡賀柳營蓮府遞相歡

送李二十九兄員外赴邠甯使幕

家襲韋平身業文素風清白至今貧南宮通籍新郎吏
西候從戎舊主人城外草黃秋有雪烽頭煙靜虜無塵
鼎門爲別霜天晚賸把離觴三五巡

送分司陳郎中祇召直史館重脩三聖實錄

蟬鳴官樹引行車言自成周赴玉除遠取南朝貴公子

重脩東觀帝王書常時載筆窺金匱暇日登樓到石渠
若問舊人劉子政如今頭白在商於

送李中丞赴楚州

緹騎來旗入楚城士林皆賀振家聲兒童但喜迎賢守
故吏猶應記小名萬頃水田連郭秀四時煙月映淮清
憶君初得崑山玉同向揚州攜手行

送李庚先輩赴選

一家何啻十朱輪諸父雙飛秉大鈞曾脫素衣參幕客
卻爲精舍讀書人離筵洛水侵栢色征路函關向晚塵
今日山翁舊賓主知君不負帝城春

送廖參謀東遊二首

九陌逢君又別離
行雲別鶴本無期
期望嵩樓上忽相見
看過花開花落時

繁花落盡君辭去
綠草垂楊引征路
東道諸侯皆故人
留連必是多情處

送從弟郎中赴浙西

并引

從弟三復十餘年
閒凡三爲浙右從事
往年主公入相
薦敷登朝中復從事
鎮南未幾而罷
昨以尙書外郎奉
使至洛旋承新命
改轅而東三從公
皆舊地徵諸故事
實無其倫故賦詩
贈之亦志異也

銜命出尙書
新恩換使車
漢庭無右者
梁苑重歸歟
又食建業水
曾依京口居

劉前軍傳云本
葛人世家京口

共經何恨事
賓

主兩如初

劉賓客文集卷第二十八

劉賓客文集卷第二十九

送僧二十四首

贈別君素上人

并引

曩予習禮之中庸至不勉而中不思而得懽然知聖人之德學以至于無學然而斯言也猶示行者以室廬之奧耳求其經術而布武未易得也晚讀佛書見大雄念物之普級寶山而梯之高揭慧火巧鎔惡見廣疏便門旁束邪徑其所證入如舟泝川未始念於前而日遠矣夫何勉而思之邪是余知突音窈奧於中庸啟鍵關於內典會而歸之猶初心也不知予者謂予困而後援佛謂道有二焉夫悟不因人而在心而已其證也猶暗人之享

太牢信知其味而不能形於言以聞于耳也口耳之間
兼寸耳尙不可使聞他人之不吾知宜矣開士君素偶
得予於所親一麻棲草千里來訪素以道眼視予予以
所視視之不由陞級攜手智地居數日告有得而行乃
爲詩以見志云

窮巷唯秋草高僧獨扣門相歡如舊識問法到無言水
爲風生浪珠非塵可昏去來皆是道此別不銷魂

送深法師遊南岳

上人本在資聖寺

師在白雲鄉名登善法堂十方傳句偈八部會壇場飛
錫無定所寶書留舊房唯應銜草雁相送至衡陽

廣宣上人寄在蜀與韋令公唱和詩卷因以令

公手札答詩示之

碧雲佳句久傳芳
曾向成都住草堂
振錫常過長者宅
披文猶帶令公香
一時風景添詩思
八部人天入道場
若許相期同結社
吾家本自有柴桑

送僧仲制東遊兼寄呈靈澈上人

釋子道成神氣閑
住持曾上清涼山
晴空禮拜見真像
金毛玉髻卿雲間
西遊長安隸僧籍
本寺門前曲江碧
松間白日照寶書
竹下香泉灑瑤席
前時學得經論成
奔馳象馬開禪局
高筵談柄一麾拂
講下聽從如醉醒
舊聞南方多長老
次第來入荆門道
荆州本自重彌天
南朝塔廟猶依然
宴坐東陽枯樹下
經行居止故臺邊

忽憶遺民社中客爲我衡陽駐飛錫講罷同尋相鶴經
閒來共蠟登山屐一旦揚眉望沃州自言王謝許同遊
憑將雜擬三十首寄與江南湯慧休

送僧元暲南遊

并引

予策名二十年百慮而無一得然後知世所謂道無非
畏途唯出世間法可盡心耳繇是在席視者多旁行

胡岡

反四句之書備將迎者皆赤頰白足之侶深入智地靜
通道源客塵觀盡妙氣來宅內視胸中猶煎鍊然開士
元暲姓陶氏本丹陽名家世有人爵不藉其資於毗尼
禪那極細密之義於初中後日習總持之門妙音奮迅
願力昭答雅聞予事佛而佞亟來相從或問師隳形之

自對曰小失怙恃推棘心以求上乘積四十年有羸老
將至而不解始悲浚泉之有列今痛防墓之未遷塗芻
莫備薪火恐滅諸相皆離此心長懸雖萬性歸佛盡爲
釋種如河入海無復水名然具一切智者豈遺百行求
無量義者甯容斷思今聞南諸侯雅多大士思扣以苦
調而希其末光無容至前有足悲者予聞是說已力不
足而悲有餘因爲詩以送之庶乎踐霜露者聆之有惻
寶書翻譯學初成振錫如飛白足輕彭澤因家凡幾世
靈山預會是前生傳鐙以悟無爲理濡露猶懷罔極情
從此多逢大居士何人不願解珠璣

送如智法師遊辰州兼寄許評事

前日過蕭寺看師上講筵都人禮白足施者散金錢方便無非教經行不廢禪還知習居士發論待彌天

贈長沙讚頭陀

外道邪山千萬重眞言一發盡摧峯有時明月無人夜獨向昭潭制惡龍

送慧則法師上都因呈廣宣上人

并引師
精淨名經

佛示滅後大弟子演聖言而成經傳心印曰法承法而能專曰宗由宗而分教曰支坐而攝化者勝義皆空之宗也行而宣教者摧破邪山之支也釋子慧則生於像季思濟劫濁乃學于一支開彼羣迷以爲盡妙理者莫如法門變凡夫者莫如佛土悟無染者莫如散花故業

于淨名深達實相自京師涉漢河歷鄢郢登衡湘聽徒
百千耳感心化法無任道行而歸顧予有社內之因故
言別之日愛緣瞥起時也秋盡詠江淹雜擬以送之前
見宣上人爲我多謝

昨日東林看講時都人象馬蹋瑠璃雪山童子應前世
金粟如來是本師一錫言歸九城路三衣曾拂萬年枝
休公久別如相問楚客逢秋心更悲

秋日過鴻舉法師寺院便送歸江陵

并引

梵言沙門猶華言去欲也能離欲則方寸地虛虛而萬
景入入必有所泄乃形乎詞詞妙而深者必依于聲律
故自近古而降釋子以詩名聞于世者相踵焉因定而

得境故翛然以清由慧而遣詞故粹然以麗信禪林之
蘊萼而誠河之珠璣耳初鴻舉學詩於荆郢間私試竊
詠發於餘習蓋榛楛之翠羽弋者未之盼焉今年至武
陵二千石始奇之有起予之歎以方袍親絳紗者十有
餘旬繇是名稍聞而藝愈變閏八月余步出城東門謁
仁祠而鴻舉在焉與之言移時因告以將去且曰貧道
雅聞東諸侯之工爲詩者莫若武陵今幸承其話言如
得法印寶山之下宜有所持豈徒衣褐之中眾花而已
余聞是說乃叩商而吟成一章章八句郡守以坐嘯餘
詠激清徵而應之師其行乎足以資一時中之學矣
看畫長廊徧尋僧一逕幽小池兼鶴淨古木帶蟬秋客

至茶煙起禽歸講席收浮栢明日去相望水悠悠

重送鴻舉赴江陵謁馬逢侍御

西北秋風彫蕙蘭洞庭波上碧雲寒茂陵才子江陵住
乞取新詩合掌看

送僧方及南謁柳員外

并引

九江僧方及旣出家依匡山一時中頗屬詩以攄思古
詩人暨今號爲能賦詩有輒求其詞吟呻之拳拳然多
多益嗜影不出山者十年嘗登最高峯四望天海冲然
有遠游之志頓錫而言曰神馳而形闕者方內之徒及
吾無方闕於何者繇是耳得必目探之意行必身隨之

雲遊鳥合

虛筵反

無迹而遠予爲連州居無何而方及至

出祓中詩一篇以貺予其詞甚富留一歲觀其行結矩
如教益多之一旦以行日來告且曰雅聞烏味之下有
賢諸侯願躋其門如蹈十地敢乞詞以抵之予唯而賦
顧其有重請之色起於顏間耳

昔事廬山遠精舍虎溪東朝陽照瀑水樓閣虹霓中騁
望羨游雲振衣若秋蓬舊房閉松月遠思吟江風古寺
厯頭陀奇峯攀祝融南登小桂嶺卻望歸塞鴻衣祓貯
文章自言學雕蟲槍榆念陵厲覆篋圖穹崇遠郡多暇
日有詩訪禪宮石門崇峭絕竹院含空濛幽響滴巖溜
晴芳飄野叢海雲懸颺母山果屬狙公忽憶吳興郡白
蘋正蔥龍願言挹風采邈若窺華嵩桂水夏瀾急火山

宵燄紅三衣濡菌露一錫飛煙空勿謂翻譯徒不為文

雅雄古來賞音者樵爨得孤桐

按狙公宜斥賦芋者而越絕書有猿公張衡賦

南都有猿父長嘯之句古文士又云權父繇是而言謂猿為父舊矣

贈日本僧智藏

浮栢萬里過滄溟徧禮名山適性靈深夜降龍潭水黑
新秋放鶴野田青身無彼我那懷土心會真如不讀經
為問中華學道者幾人雄猛得甯馨

贈眼醫婆羅門僧

三秋傷望遠終日泣途窮兩目今先暗中年似老翁看
朱漸成碧羞日不禁風師有金篦術如何為發蒙

海陽湖別涉初師

并引

瀟湘間無土山無濁水民乘是氣往往清慧而文長沙人浩初生旣因地而清矣故去葷洗慮剔顛毛而壞其衣居一都之殷易與士會得執外教盡捐苛禮自公侯守相必賜其清閒耳目灌注習浮於性而里中兒賢適與浩初比者嬰冠帶豢妻子吏得以乘陵之汨沒天慧不得自奮莫可望浩初之清光於侯門上坐第自吟羨而已浩初益自多其術尤勇於近達者而歸之往年之臨賀唁侍郎楊公留歲餘公遺以七言詩手筆于素前年省柳儀曹于龍城又爲賦三篇皆章書今復來連山以前所得雙南金出於襪亟請予贖之按師爲詩頗清而弈碁至第三品二道皆足以取幸於士大夫宜薰餘

習以深入也會吳郡以山水冠世海陽又以奇甲一州
師慕道於泉石宜篤故攜之以嬉及言旋復引與共載
於湖上弈於樹石間以植沃州之因緣且賦詩具道其
事

近郭有殊境獨遊常鮮懽逢君駐緇錫觀兒稱林巒湖
滿景方霽野香春未闌愛泉移席近聞石輟棊看風止

松猶韻花繁露未乾橋形出樹曲巖影落池寒

湘東架險凡四

橋山下出泉逗崑爲池泓澄可愛
者不可徧舉故狀其境以貽好事別路千嶂裏詩情暮

雲端他年買山處似此得隳官

觀棊歌送儂師西遊

長沙男子東林師閒讀藝經工弈棊有時凝思如入定

暗覆一局誰能知今年訪予杖小拄方袍袖中貯新藝
山城無事愁日長白晝懵懵眠匡牀因君臨局看鬪智
不覺遲景沈西牆自從山人遇樵子直到開元王長史
前身後身付餘習百變千化無窮已初疑磊落曙天星
次見搏擊三秋兵雁行布陳眾未曉虎穴得子人皆驚
行盡三湘不逢敵終日饒人損機格自言臺閣有知音
悠然遠起西遊心商山夏木陰寂寂好處裴回駐飛錫
忽思爭道畫平沙獨笑無言心有適藹藹京城在九天
貴游豪士足華筵此時一行出人意賭取聲名不要錢

贈別約師

并引

荊州人文約市井生而雲鶴性故去葦爲浮圖生寤而

證入興南抵六祖始生之墟得遺教甚悉今年訪余于
連州且曰貧道昔浮湘川會柳儀曹謫零陵宅于佛寺
幸聯棟而居者有年繇是時人大士得落耳界夫聞爲
見因今日之來曩時之因耳時儀曹牧柳州與八句贈
別

師逢吳興守相伴住禪扃春雨同栽樹秋鐙對講經廬
山曾結社桂水遠揚舫話舊還惆悵天南望柳星

送鴻舉師遊江南

并引

始余適朗州爾時是師振麻衣斐然而前持文篇以爲
僧贊唧唧而清如蟲吟秋自然之響無有假合有足佳
者故爲賦二章以聲之距今年過于建平赤甕益蕃文

思益深而內外學益富既訊已探穢中出前所與詩閱
之紙勞墨瘁與我同來因思夫苒苒之光渾渾之輪時
而言有初中後之分日而言有今昨明之稱身而言有
幼壯艾之期乃至一瞥欬一彈指中際皆具何必求三
生以異身邪然而視予之文昔與今有筵楹之別視余
之書昔與今有鈞石之懸視余之仕昔與今乃唯阿之
差耳豈有工拙之數存乎其間哉蓋可勉而進者與日
月而至矣彼儻來外物雖日月無能至焉是歲師告余
遊江西復爲賦七言以爲遊地爾

禪客學禪兼學文出山初似無心雲從風卷舒來何處
繚繞巴山不得去山州古寺好閒居讀盡龍王宮裏書

使君灘頭揀石硯白帝城邊尋野蔬忽然登高心瞥起
又欲浮杯信流水煙波浩淼魚鳥情東去三千三百里
荆門峽斷無盤渦湘平溪闊清光多廬山霧開見瀑布
江西月淨聞漁歌鍾陵八郡多名守半是西方社中友
與師相見便談空想得高齋師子吼

送霄韻上人遊天台

曲江僧向松江見又道天台看石橋鶴戀故巢雲戀岫
比君猶自不逍遙

送義舟師卻還黔南

并引

黔之鄉在秦楚爲爭地近世人多過言其幽荒以談笑
聞者又從而張皇之猶夫束蘊逐原燎或近乎語妖適

有沙門義舟道黔江而來能畫地爲山川及條其風俗
纖悉可信且曰貧道以一錫遊他方眾矣至黔而不知
其遠始遇前節使而聞今節使益賢而文故其佐多才
士摩圍之下曳裾秉筆彬彬然與兔園同風番僧以外學
嗜篇章時或攝衣爲末坐客其來也約主人乘秋風而
還今乞詞以颺之如捧意珠行住坐臥知相好耳余曰
唯命筆爲七言以應之

黔江秋水浸雲霓獨泛慈航路不迷猿狖窺齋林葉動
蛟龍聞咒浪花低如蓮半偈心常悟問菊新詩手自攜
常說摩圍似靈鷲卻將山屐上丹梯

送景玄師東歸

并引

廬山僧景玄袖詩一軸來謁往往有句輕而道如鶴雛
襪襪未有六翮而步舒視遠戛然一唳乃非泥滓間物
獻詩已斂衽而辭且曰其來也與故山秋爲期夫丐者
僧事也今無他請唯文是求故賦一篇以代瓔珞耳
東林寺裏一沙彌心愛當時才子詩山下偶隨流水出
秋來卻赴白雲期灘頭躡屐挑沙菜路上停舟讀古碑
想到舊房拋錫杖小松應有過檐枝

送元曉上人歸稽亭

重疊稽亭路山僧歸獨行遠峯斜日影本寺舊鐘聲徒
侶問新事煙雲含別情應誇乞食處蹋徧鳳凰城

送惟良上人

并引

以貌窺天者曰乾然健單于然而高以數迎天者曰其
用四十有九天果以有形而不能脫乎數立象以推莖
既成而遺之古所謂神交造物者非空言耳軒皇受天
命其佐皆聖人故得之惟唐繼天德如黃帝有外臣一
行亦聖之徒與刊麻考元書成化去今丹徒人惟良生
而能知非自外求以乾坤之筮當十期之數凝神運指
上感躔次視玄黃溟滓無倪有常絕機泯知獨以神會
數起於復之初九音生乎黃鍾之宮積微本隱言與化
合乎天人之數極而含變變而靡不通神趨鬼懾不足
駭也惟良得一行之道故亦慕其爲外臣謬謂余爲世
閒聰明子子來訪初以說合至于不言言息而理冥復

申之以嗟歎曰師其庶幾乎信神與之而不能測神之所以付信術通之而不能知術之所以洩哉余聞乎曾井蛙醯雞之不若也長慶四年冬十一月甲子語至夜艾遂爲詩以志焉

高齋灑寒水是夕山僧至玄牝無關鎖瓊書捨文字鐙明香滿室月午霜凝地語到不言時世間人盡睡

送元簡上人適越

孤雲出岫本無依勝境名山卽是歸久向吳門遊好寺還思越水洗塵機浙江濤驚師子吼稽嶺峯疑靈鷲飛更入天台石橋路垂珠璀璨拂三衣

送宗密上人歸南山草堂寺因詣河南尹白侍

郎

宿習脩來得慧根多聞第一卻忘言自從七祖傳心印
不要三乘入便門東泛滄江尋古跡西歸紫閣出塵喧
河南白尹大檀越好把真經相對翻

劉賓客文集卷第二十九

劉賓客文集卷第三十

哀挽悲傷三十八首

德宗神武孝文皇帝挽歌二首

出震清多難乘時播大鈞
操弦調六氣揮翰動三辰
運偶升天日哀深率土人
瑤池無轍跡誰見屬車塵

鳳翼擁銘旌威遲異吉行
漢儀陳祕器楚挽咽繁聲
駐驛辭清廟凝笳背直城
唯應留內傳知是向蓬瀛

敬宗睿武昭愍孝皇帝挽歌三首

寶^麻方無限仙期忽有涯
事親崇漢禮傳聖法殷家
晚出芙蓉闕春歸棠棣華
玉輪今日動不是畫雲車

任賢勞夢寐登位富春秋
欲遂東人幸^甯虞杞國憂
長

楊收羽騎太液泊龍舟
唯有衣冠在年年
愴月遊
講學金華殿
親耕鉤盾田
侍臣容諫獵
方士信求仙
虹影俄侵日
龍髯不上天
空餘水銀海
長照夜燈前

文宗元聖昭獻孝皇帝挽歌三首

繼體三才理
承顏九族親
禹功留海內
殷^麻付天倫
調露曲長在
秋風詞尙新
本支方百代
先讓棣華春

月落宮車動
風淒儀仗閒
路唯瞻鳳翼
人尙想龍顏
御宇方無事
乘雲遂不還
聖情悲望處
見日下西山
享國十五載
升天千萬年
龍鑣仙路遠
騎吹禮容全
日下初陵外
人悲舊劔前
周南有遺老
掩淚望秦川

故相國燕國公于司空挽歌二首

彤弓封舊國黑稍繼前功十年鎮南雍九命作司空池
臺樂事盡簫鼓葬儀雄一代英豪氣曉散白楊風
陰山貴公子來葬五陵西前馬悲無主猶帶朔風嘶漢
水清山郭襄陽白銅鞮至今有遺愛日暮人悽悽

重至衡陽傷柳儀曹 并引

元和乙未歲與故人柳子厚臨湘水爲別柳浮舟適柳
州余登陸赴連州後五年余從故道出桂嶺至前別處
而君沒於南中因賦詩以投弔
憶昨與故人湘江岸頭別我馬映林嘶君颿轉山滅馬
嘶循故道颿滅如流電千里江籬春故人今不見

謫居悼往二首

悒悒何悒悒長沙地卑溼樓上見春多花前恨風急猿
愁腸斷叫鶴病翹趾立牛衣獨自眠誰哀仲卿泣

鬱鬱何鬱鬱長安遠如日終日念鄉關燕來鴻復還潘
岳歲寒思屈平顛顛顏顏殷勤望歸路無雨卽登山

哭呂衡州時子方謫居

一夜霜風彫玉芝蒼生望絕士林悲空懷濟世安人略
不見男婚女嫁時遺草一函歸太史旅墳三尺邇要離
朔方徙歲行當滿欲爲君刊第二碑

遙傷段右丞

江湖舊遊
南宮交代

江海多豪氣朝廷有直聲何言馬蹄下一旦是佳城

傷桃源薛道士

壇邊松在鶴巢空白鹿閒行舊徑中
手植紅桃千樹發
滿山無主任春風

王思道碑堂下作

蒼蒼宰樹起寒煙
尙有威名海內傳
四府舊聞多故吏
幾人重淚拜碑前

遙傷工中丞

并引

河南正絳有詞藻
與余同升進士科
從事鄴下不幸遇
害故爲傷詞

鄴下殺才子
蒼忙冤氣凝
枯楊映漳水
野火上西陵
馬鬣今無所
龍門昔共登
何人爲弔客
唯是有青蠅

傷獨孤舍人

并引

貞元中余以御史監祠事河南獨孤生始仕爲奉禮郎
有事宗廟郊時必與之俱繇是甚熟及余謫武陵九年
閒獨孤生仕至中書舍人視草禁中上方許以宰相元
和十年春余祇召抵京師次都亭日舍人疾不起余聞
因作傷詞以爲弔

昔別矜年少今悲喪國華遠來同社燕不見早梅花

余次敷水驛伏覩華州舅氏昔日行縣題詩處

潛然有感

昔日股肱守朱輪茲地遊繁華日已謝章句此空留蔓
草佳城閉故林棠樹秋今來重垂淚不忍過西州

湖南觀察使故相國袁公挽歌三首

五驅龍虎節一入鳳凰池令尹自無喜羊公人不疑天
歸京兆日葉下洞庭時湘水秋風至淒涼吹素旗
丹旄發江皋人悲雁亦號湘南罷亥市漢上改詞曹表
墓雙碑立尊名一字褒常聞平楚獄爲報里門高
返葬三千里荆衡達帝畿逢人卽故吏拜奠盡沾衣地
得青烏相賓驚白鶴飛五公碑尙在今日亦同歸

代靖安佳人怨二首

并引

靖安丞相武公居里名也元和十一年六月公將朝夜
漏未盡三刻騎出里門遇盜薨于牆下初公爲郎余爲
御史繇是有舊故今守于遠服賤不可以誄又不得爲
歌詩聲于楚挽故代作佳人怨以裨于樂府云

寶馬鳴珂蹋曉塵魚文七首犯車茵適來行哭里門外
昨夜華堂歌舞人

秉燭朝天遂不回路人彈指望高臺牆東便是傷心地
夜夜秋螢飛去來

傷愚溪三首

并引

故人柳子厚之謫永州得勝地結茅樹蔬爲沼沚爲臺
榭曰愚溪柳子沒三年有僧遊零陵告余曰愚溪無
復曩時矣一聞僧言悲不能自勝遂以所聞爲七言以
寄恨

溪水悠悠春自來草堂無主燕飛回隔簾惟見中庭草
一樹山榴依舊開

草聖數行留壞壁木奴千樹屬鄰家唯見里門通德榜
殘陽寂寞出樵車

柳門竹巷依依在野草青苔日日多縱有鄰人解吹笛
山陽舊侶更誰過

碧漏寺見元九侍御和展上人詩有三生之句

因以和

廊下題詩滿壁塵塔前松樹已皴鱗古來唯有王文度
重見平生竺道人

傷秦姝行 并引

河南房開士前爲虞部郎中爲余話曰我得善箏人于
長安懷遠里其後開士爲赤縣牧容州求國工而誨之

藝工而天今年開士遺予新詩有悼佳人之目顧予知
所自也惜其有良伎獲所從而不可久乃爲傷詞以貽
開士

長安二月花滿城插花女兒弄銀箏南宮仙郎下朝晚
曲頭駐馬聞新聲馬蹄逶遲心蕩漾高樓已遠猶頻望
此時意重千金輕烏傳消息紺輪迎芳筵銀燭一相見
淺笑低鬟初目成蜀弦錚指如玉皇帝弟子韋家曲
青牛文梓赤金簧玫瑰寶柱秋雁行斂蛾收袂凝清光
抽弦緩調怨且長八鸞鏘鏘渡銀漢九雛威鳳鳴朝陽
曲終韻盡意不足餘思悄絕愁空堂從郎鎮南別城闕
樓船理曲瀟湘月馮夷蹁蹁舞綠波鮫人出聽停綃梭

北池含煙瑤草短萬松亭下清風滿

北池萬松亭皆容州勝槩

秦聲

一曲此時聞嶺泉鳴咽容南斷來自長陵小市東
蕤華零落瘴江風侍兒掩泣收銀甲鸚鵡不言愁
玉籠博山鑪中香自滅鏡奩塵暗同心結從此東
山非昔遊長嗟人與弦俱絕

夔州竇員外使君見示悼妓詩顧余嘗識之因
命同作

前年曾見兩鬟時今日驚吟悼妓詩鳳管學成知有籍
龍媒欲換歎無期空廊月照常行地後院花開舊折枝
寂寞魚山青草裏何人更立智瓊祠

竇夔州見寄寒食日憶故姬小紅吹笙因和之

鸞聲窈眇管參差清韻初調眾樂隨幽院妝成花下弄
高樓月好夜吹時忽驚莫槿飄零盡唯有朝雲夢想期
聞道今年寒食日東山舊路獨行遲

傷循州渾尚書

貴人淪落路人哀碧海連翩丹旆回遙想長安此時節
朱門深巷百花開

哭龐京兆

少年有俊氣嘗
擢制科之首

俊骨英才氣褻然策名飛步冠羣賢逢時已自致高位
得疾還因倚少年天上別歸京兆府人間空歎茂陵阡
今朝纔帳哭君處前日見鋪歌舞筵

再傷龐尹

京兆歸何處章臺空莫塵可憐鸞鏡下哭殺畫眉人

哭王僕射相公

名播時兼
鹽鐵暴薨

于侯一日病滕公千載歸門庭颯已變風物慘無輝羣
吏謁新府舊賓沾素衣歌堂忽莫哭賀雀盡驚飛

傷韋賓客纘

自工部尚書
除兵賓客

韋公八十餘位至六尚書五福唯無富一生誰得如桂
枝攀最久蘭省出仍初海內時流盡何人動素車

再經故元九相公宅池上作

故池春又至一到一傷情雁鷺羣猶下蛙蟻衣已生竹
叢身後長臺勢雨來傾六尺孤安在人間未有名

劉賓客文集卷第三十